

Communicaziun a las medias – SRG SSR Svizra Rumantscha (SRG.R)

Preparar in program da musica che plascha a giuven e vegl n'è strusch pussaivel

SRG.R: Cuiria, ils 13-09-2019

La musica da RTR è stada en il center da las observaziuns dal Cussegl dal public (Cdp) da la SRG.R. Sur plirs mais ha il Cdp tadlà diversas emissiuns ed analisà ils programs da musica dal Radio Rumantsch. Il resultat na fa betg surstar. Per far endretg a tut las audituras ed auditurs stuess RTR avair a disposiziun plirs emetturs.

Il Cdp è conscient da la situaziun difficila che la musica sin RTR na po betg satisfar a mintgin. El lauda dentant l'elecziun e la frequenza da musica rumantscha e svizra en il Radio Rumantsch. Ils ultims onns ha RTR auzà la quota da musica svizra sin passa 50%. Bunas notas survegn er l'emissiun Semperverds, e quai malgrà che quest'emissiun n'è betg stada moderada durant il temp da stad. Il Cdp intimescha RTR dentant era d'esser in zic pli curaschus cun integrar novs stils da musica en ses program.

Play RTR – ina applicaziun che persvada

In design survesaivel, logic, simpel e bun. Cun quests plets lauda il Cdp la mediateca Play RTR ch'ins cuntanscha u sur l'internet: www.rtr.ch/play ni sur la app nativa per iOS u per Android. La funcziun da tschertgar saja buna ed i dettia in bun mix tranter novitads, chausas or da l'archiv, emissiuns pli lungas sco per exempel Cuntrasts u emissiuns d'infurmaziun sco per exempel Telesguard. Meglieraziuns pudessi dar tar contribuziuns che cumparan en pliras categorias. Questas dublettas pudessan ins evitar cun stgaffir dapli categorias. Cunquai che questa applicaziun è colliada cun las applicaziuns da las autras unitads da la SRG SSR n'è quai dentant betg uschè simpel perquai che diversas funcziuns valan per tut las unitads.

Pagina rtr.ch en nov vestgì

Il favrer passà ha la pagina d'internet rtr.ch survegnì in nov vestgì. Quel plascha en general bain al Cdp. La pagina saja structurada bain cun ina buna survista ed in layout attractiv. Crititgada vegn la pagina d'entrada che saja magari in zic surchargiada. En general possian ins dentant dir che la nova pagina saja pli leva e frestga che la veglia. Las fotografias sajan

per il pli d'auta qualidad ed ils dossiers in grond stgazi per lingua e cultura. Punctuà vegn surtut er che la pagina portia novitads regionalas, quai che vegn valità sco fitg impurtant.

In sguard enavant

En la seduta dal november vegn il Cdp a s'occupar cun las elecziuns. D'ina vart en spezial cun ils rapports da la dumengia d'elecziuns e da l'autra vart cun il project "Ti ed jau faschain politica – 5 inscunters tranter populaziun e politica". Ultra da quai observa il Cdp la nova furma da co-moderaziun che RTR introducescha a partir da l'october proxim, la damaun tranter las 6.00 e las 9.00.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accumpogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79, telefonin 078 722 53 73